

23-March-2026

आकाशवाणी

खबरां विजय बजाज कोला,

पैहले खास-खास खबरां:-

1. प्रधानमंत्री नरेन्द्र मोदी हों पच्छिम एशिया च जारी तनोतनी दे मद्देनजर हालात दी समीक्षा लेई सुरक्षा सरबंधी कैबिनेट कमेटी दी बैठक लाई। उ'नें आखेआ जे नागरिकें गी इस संघर्ष दे असर थमां बचाने आस्तै सब्बे संभव जतन कीत जाडन।
2. ईरान नै चेतावनी दिती ऐ कि जेगर अमरीका नै ओदे ऊर्जा संयंत्रें पर हमला कीता- तां होर्मुज जल डमरु मध्य गी पूरी चाल्ली बंद करी दिता जाहग।
3. असम- केरलम ते पुदुचेरी च असेम्बली चुनाएं लेई नामांकन भरने दा अज्ज खीरी ध्याड़ा ऐ।
4. पच्छिम बंगाल दे मुख् चुनांs अधिकारी मनोज कुमार अग्रवाल हों आखेआ ऐ जे चुनांs आयोग अज्ज SIR प्रक्रिया दे तैहत पैहली पूरक मतदाता सूची प्रकाशत करोग।
5. खेलो इंडिया जनजातीय खेड्दां 25 मार्च कोला 3 अप्रैल धोड़ी छत्तीसगढ़ च आयोजित होन जा'रदियां न।
6. ते स्क्वाश च अभय सिंह ते अनाहत सिंह ने कल JSW Indian Open -2026 स्क्वाश टूर्नामेंट दे खीरी रोज बिलतरतीब मर्दे ते महिला खताब जिती लैता ऐ।

<><><><><><>

PM -CCS Meeting

प्रधानमंत्री नरेन्द्र मोदी हों पच्छिम एशिया च जारी संघर्ष दे मद्देनजर बने दे हालात ते प्रस्तावित राहत उपाएं दी समीक्षा लेई मंत्रिमंडल दी सुरक्षा मामलें दी समीति -CCS दी इक बैठक दी प्रधानता कीती। श्री मोदी हों आखेआ जे एह संघर्ष लगातार बदला करदा ऐ ते इसने पूरी दुनिया गी कुसै नां कुसै चाल्ली प्रभावत कीता ऐ। उ'नें गलाया जे ऐसे हालात च नागरिकें गी इस संघर्ष दे असर थमां बचाने लेई हर संभव जतन कीते जाने लोइचदे न। प्रधानमंत्री हों निर्देश दिता जे सरकार दे सब्बे अंग मिलिये कम्म करन तांजे नागरिकें गी घट्ट कोला घट्ट परेशानी होऐ। उ'नें राज्य सरकारें दे कन्नै उचित तालमेल जकीनी बनाने लेई बी आखेआ तांजे इस गल्लै गी पक्का कीता जा जे जरुरी चीजें दी कालाबाजारी ते जमाखोरी नैई होऐ। श्री मोदी हों मंत्रियें ते सचिवें दे इक समूह दे गठन दा निर्देश दिता-जेहड़ा समय सरकारी नजरियें दे कन्नै समर्पित रुप कन्नै कम्म करोग।

<><><><><><>

Iran -Hormuz

ईरान ने चेतावनी दिती ऐ कि जेगर अमरीका ओदे ऊर्जा संयंत्रें पर हमला करदा ऐ- तां होर्मुज जल डमरु मध्य गी पूरी चाल्ली बंद करी दिता जाहग ते इस खिते च स्थित इजरायल ते खाड़ी मुल्खणं दे ऊर्जा बुनियादी ढांचे- जित्थे अमरीका दे

ठिकाने न- ओह ओदे निशाने पर होडन। ईरान दे सरकारी मीडिया आसेआ जारी इक ब्यान च खातम-अल-अनबिया केन्द्री मुख्यालय दे प्रवक्ता इब्राहिम जोल्फागरी होंरें आखेआ ऐ जे होर्मुज जल डमरु मध्य छड़ा दुश्मन आस्तै बंद ऐ पर जेगर अमरीका दे राष्ट्रपति अपनी धमकियें पर अमल करदे न- तां इसी पूरी चाल्ली बंद करी दिता जाहग। खातम अल-अनबिया केन्द्री मुख्यालय ईरान दी सबनें शा उच्ची परिचालन कमान इकाई ऐ- जेहड़ी फौज ते इस्लामिक क्रांति रक्षक कोर -IRGC दे बश्कार अभियानें दा तालमेल करदी ऐ।



Keralam-Nominations

केरलम, असम ते पुदुचेरी च विधानसभा चुनांस लेई पर्चे दाखल करने दी खीरी तरीक अज्ज खत्म होआ करदी ऐ। नामांकन-पर्चे दी जांच कल 24 मार्च गी होग। मतदान 9 अप्रैल गी होग ते वोटें दी गिनतरी दा कम्म 4 मई गी होग। तमिनाडू च चुनां इक्के चरण च 23 अप्रैल गी होग जिस्सलै के पच्छिम बंगाल च चुनां दंडु चरणे च 23 ते 29 अप्रैल गी होग। तमिनाडू ते पच्छिम बंगाल च पैहले गेड़ दे असैम्बली चुनां लेई अधिसूचना इस म्हीने दी 30 तरीक गी जारी कीती जाग। पच्छिम बंगाल च दूए गेड़ दे चुनां लेई अधिसूचना 2 अप्रैल गी जारी होग।



WB- Supplementary

पच्छिम बंगाल दे मुख्क चुनांस अधिकारी मनोज कुमार अग्रवाल होंरें आखेआ ऐ जे चुनांस आयोग अज्ज SIR प्रक्रिया दे तैहत पैहली पूरक मतदाता सूची प्रकाशत करोग। एहदे च ओकड़े मतदाताएं दे नांस शामिल होगन- जिंदे दस्तावेजें दी पूरी चाल्ली तस्दीक होई गेदी ऐ ते जेहड़े निर्णय सूचि च बकाया न। चुनांस आयोग दे सूतरें दस्सेआ ऐ जे 27 लक्ख बकाया मतदाताएं दा रिकार्ड संशोधित होई गेदा ऐ ते हर रोज तकरीबन 2 लक्ख नाएं दे संशोधन दी प्रक्रिया जारी ऐ। सूची प्रकाशित होने दे बाद मतदाता कुसै बी ऐतराज दी स्थिति च आयोग दी अधिकारिक वैबसाईट- ECI NET ऐप्प दे राहें जां फ्ही जिला जां उपमंडल दफतरें च जाइयै अपील करी सकदे न। सर्वोच्च अदालत दे निर्देशें परैन्त 23 जिलें च 19 अपील न्यासधिकरण स्थापत कीते गे न- जिंदे च हाई कोर्ट दे साबका न्यासधीशें गी नियुक्त कीता गेआ ऐ।



Pak Terror Index

वैश्विक आतंकवाद सूचकांक 2026 दे मताबक पाकिस्तान दुनिया दे मुख्के च सब्भनें शा पैहले नम्बरें पर आई गेआ ऐ ते पिच्छले बरे उत्थे आतंकवादी घटनाएं च 4 प्रतिशत दा बाददा दर्ज कीता गेआ ऐ- जेहड़ा 2013 दे बाद सबनें शा मता प्रभावत बरा रेहा ऐ। 2013 च उत्थे आतंकवाद दियें घटनाएं च होई दियें मौतें दी गिनतरी इक ज्हार 45 ही- जेहड़ी 2015 च इक ज्हार 139 दर्ज कीती गई ऐ। आतंकवाद प्रभावत 163 मुख्कएं च पाकिस्तान नै पैहली थाहर हासल कीती। एह रिपोर्ट Vision of Humanity आसेया जारी कीती गई ऐ- जेहड़ा पाकिस्तान च सुरक्षा हालात दे उप्परोतली बिगड़दे जाने दी सारत दिंदा ऐ।



Khelo India Tribal

खेलो इंडिया जनजातीय खेड्ढां 25 मार्च कोला 3 अप्रैल धोड़ी छतीसगढ़ च आयोजित होने जा'रदियां न। रायपुर, जगदलपुर ते सरगुजा च आयोजित होने आहली इनें खेड्ढे च 23 सौ कोला मते खडढारिये दे हिस्सा लैने दी मेद ऐ-जेहडे तीरअंदाजी फुटबाल, एथलेटिक्स, हॉकी, तराकी, कुश्ती, वेटलिफ्टिंग, कौड्डी ते मलसम्भ सनें बक्ख-बक्ख खेड्ढ मकाबले च हिस्सा लैगंन। छतीसगढ़ च 32 प्रतिशत कोला मती अबादी जनजातीय समुदाये दी ऐ।



Chess Humpy

शतरंज च भारतीय ग्रैंड मास्टर कोनेरु हम्पी नै पच्छिम एशिया च चलै करदे संघर्ष दी पछोकड़े अपनी व्यक्तिगत सुरक्षा ते सेहत गी सब्भनें शा उप्पर दस्सदे होई औंदी फिडे महिला कैंडिडेट्स टूर्नामेंट चा अपना नां वापस लैने दा फैसला लैता ऐ। फिडे महिला कैंडिडेट्स टूर्नामेंट 28 मार्च कोला साइप्रस च शुरु होइये 26 अप्रैल 2026 तगर चलोग। अपनी इक सोशल मीडिया पोस्ट च हम्पी नै एह घोषणा कीती ऐ।



Squash

ते हून स्कवाश अभय सिंह ते अनाहत सिंह नै कल JSW Indian Open 2026 स्कवाश टूर्नामेंट दे खीरी रोज बिलतरतीब मर्दे ते महिला खताब जिती लैता ऐ। मर्दे दा खताबी मकाबला पूरी चाली भारती खडढारिये बश्कार हा- जेहदे च दुनिया दे दुए नम्बरै दे खडढारी अभय सिंह नै अपने गै देस दे दुनिया दे चौथे नम्बरै दे खडढारी वीर चोत्रानी गी 3-0 कन्ने रहाई दिता। तौंआई महिला वर्ग च भारत दी अनाहत सिंह नै मिस दी हान मोअ ताज़ गी 3-1 कन्ने रहायइये खताब पर अपना कब्जा बरकरार रखेया।



Read by : **Vijay Bajaj**
Stand by : **Jagmohan Sharma**
D.E.O. : **Rajni Devi**
Skilled : **Rajat Paul**
Editor : **Abhilasha Sharma**